

Održane konsultacije o statutu REKOM-a

# Činjenice o žrtvama interes regiona

**Naš izlaz iz prošlosti je upravo regionalni pristup i sazrela društvena potreba da se prema prošlosti odnosimo tako što ćemo znati sve o svim žrtvama, kazala Nataša Kandić**

Udruženje BH novinari i Centar informativno-pravne pomoći jučer su u Sarajevu u ime Koalicije za REKOM - Komisije za ustanovljenje i javno iznošenje činjenica o ratnim zločinima i drugim teškim povredama ljudskih prava u bivšoj Jugoslaviji, održali regionalne konsultacije s predstavnicima udruženja žrtava iz BiH i regije, o nacrtu statuta REKOM-a.

## Isti standard za sve

Konsultacije o statutu REKOM-a vode se od maja, a ovo su prve regionalne konsultacije s udruženjima žrtava rata.

Nataša Kandić, izvršna direktorica Fonda za humanitarno pravo iz Beograda, kazala je da je inicijativa već ohrabrena političkim podrškama koje je dobila od vjerskih zajednica na Kosovu i Hrvatskoj, od Parlamenta Crne Gore, predsjednika Hrvatske Ive Josipovića i Srbije Borisa Tadića te još nekih političkih struktura u regionu.

- Moramo znati sve o žrtvama, ali mora da postoji isti standard za sve. U tome jeste legitimitet ove inicijative. Ona polazi od jednog jedinog zajedničkog interesa, a to je da su zbog budućnosti, zbog prošlosti, žrtava, vraćanja povjerenja i dostojanstva potrebne, prije svega, činjenice o svim žrtvama neovisno o vjeri, ispovijesti i nacionalnosti, kazala je Kandić, dodavši da je to jedina garancija da se zločin neće pono-



Foto: D. TORCHE

## S jučerašnjeg sastanka

viti. Navela je da u oktobru predstoji veliki regionalni skup religijskih zajednica u BiH, sa kojeg očekuje podršku REKOM-u.

- Čekamo da prođu izbori u BiH, pa da se obratimo i Predsjedništvu BiH. U inicijativu se uključilo i makedonsko i slovensko civilno društvo. To je dobro, jer ja mislim da je naš izlaz iz prošlosti upravo regionalni pristup i sazrela društvena potreba da se prema prošlosti odnosimo tako što ćemo znati sve o svim žrtvama, kazala je Kandić.

Statut REKOM-a, nakon što bude usvojen, bit će upućen nadležnim institucijama u državama s prostora bivše Jugoslavije na usvajanje. Murat Tahirović, predsjednik Saveza logoraša BiH istaknuo je da je REKOM u fazi formiranja i da se njegovi rezultati tek očekuju, a to će biti nakon što statut bude prihvaćen u parlamentarnim skupštinama zemalja bivše Jugoslavije.

On je iznio stav Saveza logora-

ša BiH da se pitanje žrtava mora rješavati na regionalnom nivou, naročito iz razloga što Savez na čijem je čelu ima veliki broj članova koji su tokom rata bili zarobljeni na prostorima država koje su susjedi BiH. Ova komisija, smatra Tahirović, neophodna je iz razloga što treba "prisiliti" vlasti regiona da počnu ažurnije rješavati pitanja ratnih zločina.

- Mi u BiH ne možemo sami riješiti pitanje žrtava i njihovog statusa. Prije pet godina je usvojen Zakon o nestalim osobama BiH, ali nikada nije ugledao svjetlo dana, a nemamo ni zakon o pravima svih žrtava ratnog zločina. Znači, to moramo raditi na nivou regiona, jer i region ima veliki uticaj na BiH, kazao je Tahirović.

On je istaknuo da u svim državama regiona pa i BiH ima političke manipulacije žrtvama, te naglasio da nijedna stranka u BiH u svome predizbornoj programu nema prijedlog rješenja pitanja

statusa žrtava proteklog rata. Savez logoraša se, dodao je Tahirović, najviše uzda u međunarodne institucije, koje su, uz ostalo, obavezale BiH da prilikom pristupa EU mora riješiti pitanje žrtava.

Hiba Mehmedović, članica Udruženja Žrtva rata 92-95. iz Vlasenice, koje je osnovano prije par godina i majka dva sina identificirana 2009, smatra da identifikacija žrtava ide veoma sporo.

- Mnogo očekujem od REKOM-a i želim da se konačno krene i da se dođe do istine. Ne mogu oprostiti, ali ne želim da se ikome ovako nešto dogodi, kazala je Mehmedović.

## Problem RS-a

Međutim, određeni broj udruženja žrtava iz RS-a i dalje ne želi učestvovati u radu REKOM-a. Dragislav Mijanović, predstavnik Udruženja ratnih vojnih invalida opštine Zvornik, došao je na konsultacije u Sarajevo. Njemu je to, kako je kazao, od 1992. prvi dolazak u grad u kojem je živio prije rata.

- Razgovarao sam sa mnogim udruženjima iz RS-a, a mogli ste vidjeti i na ovom skupu da se mnoga udruženja nisu odazvala. Razlog je što smatraju da istina o radu tih udruženja u REKOM-u ne dolazi na vidjelo, kazao je Mijanović, dodavši kako "vjeruje da entitet RS neće pristati da se formira komisija REKOM-a".